

Na osnovu člana 4.2. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 51. stav 8. Pravilnika o licencama – Prečišćeni tekst ("Službeni glasnik BiH", broj 63/16), na inicijativu Državne regulatorne komisije za električnu energiju, na sjednici Državne regulatorne komisije za električnu energiju, održanoj dana 16. oktobra 2019. godine, donijeta je

## **ODLUKA O SUSPENZIJI LICENCE**

1. Društvu "Erdal", d.o.o. Sarajevo, suspendira se licenca za obavljanje djelatnosti međunarodne trgovine električnom energijom, registracijskog broja 05-28-12-118-19/18, izdata 23. maja 2018. godine.
2. Licenca iz tačke 1. ove odluke suspendira se počev od 1. oktobra 2019. godine do okončanja postupka ukidanja licence.
3. Društvo "Erdal" nema obavezu plaćanja regulatorne naknade za vrijeme trajanja suspenzije licence.
4. Ova odluka stupa na snagu danom donošenja, a dispozitiv će biti objavljen u "Službenom glasniku BiH" i službenim glasilima entiteta.

### *Obrazloženje*

Odlukom Državne regulatorne komisije za električnu energiju (DERK), broj 05-28-12-118-19/18 od 23. maja 2018. godine, Društvu "Erdal", d.o.o. Sarajevo izdata je licenca za obavljanje djelatnosti međunarodne trgovine električnom energijom, na period od 1. jula 2018. godine do 30. juna 2023. godine.

Prema Standardnim uvjetima za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16), vlasnici licence su obavezni, između ostalog, permanentno ispunjavati opće i specifične kriterije propisane Pravilnikom o licencama, na osnovu kojih im je izdata licenca, te DERK-u plaćati regulatornu naknadu u periodu važenja licence. Shodno tome, vlasnici licence imaju kontinuiranu obavezu održavati i DERK-u dokazivati svoju finansijsku stabilnost, što je jedan od općih kriterija za izdavanje licence.

Sami navodi vlasnika licence da se nalazi u finansijskim problemima zbog nemogućnosti naplate potraživanja od svojih kupaca, potvrđeni su i izostankom plaćanja jednokratne naknade za obradu zahtjeva za ukidanje licence, propisane Odlukom o visini jednokratne naknade za provođenje postupka u skladu sa Pravilnikom o licencama ("Službeni glasnik BiH", broj 41/13 i 17/16). Naime, Društvo "Erdal" obratilo se DERK-u 18. septembra 2019. godine zahtjevom za ukidanje posjedujuće licence, ali je po pregledu podnesenog zahtjeva utvrđeno da je isti nepotpun. O sadržaju nedostataka zahtjeva, načinu i rokovima njihovog otklanjanja, Društvo "Erdal" je obaviješteno aktom broj 05-28-12-335-2/19 od 23. septembra 2019. godine.

Činjenica da Društvo "Erdal" nije otklonilo nedostatke zahtjeva i izvršilo uplatu jednokratne naknade, onemogućila je postupanje po istom, ali i potvrdila ranije navode Društva, te indicirala DERK-u da je finansijska stabilnost i platežna sposobnost ovog Društva upitna.

Indicije su potvrđene izostankom izmirivanja obaveze po osnovu regulatorne naknade za četvrti kvartal 2019. godine, čije je plaćanje kvartalno unaprijed, a najkasnije do 30. septembra 2019. godine, naloženo Rješenjem DERK-a broj 05-28-12-370-7/18 od 18. decembra 2018. godine.

Osim što je, shodno članu 51. stav 7. Pravilnika o licencama – Prečišćeni tekst (“Službeni glasnik BiH”, broj 2/05), propuštanje plaćanja regulatorne naknade samo po sebi razlog za suspenziju licence, isto je čvrst i pouzdan pokazatelj da vlasnik licence krši obaveze utvrđene tačkom 2.1. Standardnih uvjeta za korištenje licence za obavljanje djelatnosti međunarodne trgovine električnom energijom jer je prestao ispunjavati kriterij finansijske i ekonomske sposobnosti, kao jedan od općih kriterija na osnovu kojih mu je izdata licenca.

Izostanak finansijske stabilnosti licenciranih subjekata može imati negativne konsekvence po druge subjekte u sektoru električne energije, funkcioniranje tržišta električne energije i kvalitet snabdijevanja električnom energijom, što daje dovoljno osnova DERK-u da ga smatra naročitim kršenjem odredbi uvjeta za korištenje izdate licence. Cijeneći prevashodno navedeno, ali ne zanemarujući finansijske implikacije izostanka plaćanja regulatorne naknade po DERK, to je na osnovu člana 57. stav (7) Pravilnika o licencama – Prečišćeni tekst, odlučeno kao u dispozitivu ove odluke.

Imajući u vidu da je DERK, u skladu sa pravilima i propisima, ranije inicirao i formalno pokrenuo postupak suspenzije ove licence dostavljanjem obavijesti vlasniku licence, ali i činjenicu da vlasnik licence u prethodnom periodu nije obavljao djelatnost međunarodne trgovine električnom energijom, to ova odluka nije od utjecaja na prava i pravne interese drugih subjekata i stoga nema smetnje da se licenca suspendira sa povratnim dejstvom.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema ove odluke.

Broj: 05-28-12-335-4/19

Predsjedavajući Komisije

16. oktobra 2019. godine

Tuzla

Suad Zeljković